

একদিন আমরাও তারা হব
নক্ষত্রের মেলায় মুখোমুখি বসে
অনন্তে পাড়ি দেব,
শিশিরে পা ভিজিয়ে হেঁটে যাব
দ্বিধাহীন ভবিষ্যতে,
যেখানে তোমার অপেক্ষায়
পৃথিবীর সব সুন্দর।

নিষ্পাপ সুন্দরের অভিবাদনে
তোমার আরক্তিম মুখ দেখে,
আমি হব আদিম পুরুষ
তোমাকে সাজিয়ে নিব বুনোফুলে,
পাতার ফাঁকে লুকিয়ে থাকা
পাখির শিষ শুনে
শুরু হবে ভালোবাসার উৎসব।

আমাদের প্রেমের পরিণয়ে জন্ম নিবে
নতুন পৃথিবীর স্বপ্ন,
সত্যের সংগ্রামে
মৃত্যুহীন মিছিলে মৃত্যু কামনায়
একদিন সেও হয়ত হবে শহীদ,
শহীদের মেলে দেয়া সিঁড়ি বেয়ে
আমরাও ঠাঁই নিব কাঙ্ক্ষিত গন্তব্যে।